



جمعية العلماء ومدرسي الدين الإسلامي بسنغافورة

PERSATUAN ULAMA DAN GURU-GURU AGAMA ISLAM (SINGAPURA)  
SINGAPORE ISLAMIC SCHOLARS & RELIGIOUS TEACHERS ASSOCIATION

**PERGAS**

## **KENYATAAN MEDIA**

16 Januari 2015

### **RESPON PERGAS TERHADAP PENERBITAN KARIKATUR MAJALAH MINGGUAN SATIRA 'CHARLIE HEBDO' YANG DIDAKWA SEBAGAI NABI MUHAMMAD S.A.W.**

Merujuk kepada penerbitan terbaru majalah mingguan satira negara Perancis yang bernama 'Charlie Hebdo' pada Rabu lalu yang memaparkan karikatur yang didakwa sebagai Nabi Muhammad s.a.w. Tindakan tidak bertanggungjawab ini bukan satu perkara yang baru, malah sebelum ini penerbitan yang sama juga pernah memaparkan karikatur yang didakwa sebagai Nabi Isa a.s., Nabi yang diiktiraf agama Islam dan Kristian.

2 Pergas amat kesal dengan tindakan ini dan menyifatkannya sebagai satu langkah biadap terhadap agama Islam dan umatnya. Malah tindakan terbaru ini bakal menyemarakkan lagi kemarahan umat Islam di seluruh dunia, dan boleh menimbulkan provokasi dan tindak balas dari golongan ekstremis.

3 Kesan dari penerbitan sebelumnya yang turut menghina Nabi Muhammad s.a.w., telah berakhir dengan pembunuhan beberapa kartunis majalah satira 'Charlie Hebdo' dan tiga pegawai polis Perancis termasuk seorang pegawai beragama Islam, Ahmed Merabat; yang turut mengakibatkan tindak balas terhadap masyarakat Islam di Perancis; seperti lontaran bom di sebuah masjid di Le Man, pengeboman sebuah restoran yang terletak bersebelahan masjid di Villefranche-sur-Saone dan lelasan tembakan ke sebuah masjid di Port-la-Nouvelle, Perancis yang telah dilaporkan oleh media tempatan dan antarabangsa.

4 Ingin ditegaskan juga, bahawa Pergas amat kesal dan mengutuk keras pembunuhan serta apa jua tindakan kekerasan yang berlaku dan menjejaskan masyarakat Islam dan bukan Islam disebabkan kejadian ini.

5 Islam meletakkan kedudukan yang tinggi kepada para Nabi dan Rasulnya. Lantaran itu, Ulama Islam telah menegah perbuatan melukis potret Nabi Muhammad s.a.w. serta para Nabi dan Rasul yang lain. Menurut fatwa terbitan Dar Al-Ifta' negara Mesir, larangan ini adalah untuk memelihara kedudukan dan kemuliaan para Nabi dan Rasul dalam Islam. Atas dasar pemeliharaan ini, maka ditegah daripada menggambarkan mereka dalam sebarang bentuk lukisan mahupun lakonan.

6 Di kesempatan ini, Pergas mengalu-alukan kematangan masyarakat Islam Singapura sejauh ini dalam menangani situasi ini. Pergas ingin terus menyeru umat Islam agar terus mengekalkan sikap matang ini dalam menghadapi provokasi pihak yang tidak bertanggungjawab lagi ekstrem seperti penerbitan kartun terbitan 'Charlie Hebdo' ini.

7 Dalam pada masa yang sama, Pergas ingin menggesa masyarakat Islam Singapura agar tidak membantu dalam menyebarkan karikatur yang menghina agama Islam ini. Sebarang langkah menyebarkan karikatur tersebut merupakan satu publisiti percuma yang membantu lagi pengedaran dan populariti penerbitan 'Charlie Hebdo'.

8 Pergas berharap agar isu ini menjadi satu iktibar buat masyarakat Islam Singapura untuk terus bersyukur dengan keamanan yang diraih dan terus menghargai keharmonian yang dinikmati di negara ini. Semoga sebarang ketegangan dapat dihuraikan dan hubungan baik di antara masyarakat berbilang agama dapat diperkukuhkan melalui sikap hormat dan saling memahami.

## **PERSATUAN ULAMA DAN GURU-GURU AGAMA ISLAM (SINGAPURA)**